



Basler Bebbi Basel Jungi Garde

Dert ääne am Bärgli

Eiger, Eiger in der Wand,
wer ist der schönste TV-Star im Land?

Dert ääne am Bärgli dert stoot e wysse Maa.
Äär het e Seil am Ranze
und luegt in d'Kamera.
HOLA Duulli Duli Duuli, das sin jo ganz cooli,
HOLA Duuli Duli Duuli HOLA Duli Duli Duu.
Luegsch gnau aane gseesch dr Äschbi,
mit me liebe, warme Bligg.
In umschwirrt e wilds Wäschbi,
sticht'n verständnisvoll in's Gnigg.
Äär duet sich au im aabe Falle gfallt,
drotzdäm duet's bim Ufschloo gnalle.

Dert ääne am Bärgli dert hängt e diggi Frau.
Aabunde a vyyl Saali
stellt si sich zer Schau.
HOLA Duulli Duli Duuli, si isch e ganz cooli,
HOLA Duuli Duli Duuli HOLA Duli Duli Duu.
D'bela Nella gsicheret mit 14 Karabiinerheegge,
hersch us dr Nordwand „musica“ bleege.
Do gseet si e bluetjunge Alpinischt,
wingt m zue, dasch e Misch.
'S Glyychgewicht fir eimool verlooore
loot au d'Nela nit ungschoore.
Die Lawiine donneret in's Daal aabe,
duet 3 Chalet under sich begrabe.

Dert ääne am Bärgli dert stoot e schreege Maa.
Äär het schwitzigi Händli
und e Bappnaase aa.
HOLA Duulli Duli Duuli, sini Pointe sin fuuli,
HOLA Duuli Duli Duuli HOLA Duli Duli Duu.
Dr Almi, im Jargon „Witz-Erotomaan“,
lyydet fescht under sym Greesewaan.
E grummi Biire und si fetzlig Grinse,
zaale in de Bärge nyt vyyl Zinse.
Bim letschte Witz isch 's Sail vor Schaam grisse.
Almi, mr wärde Di nit wiirgligg vermisse.

Dert ääne am Bärgli dert stoot e groove Buuse.
Drum umme blondi Ho-or
und alli wänn schmuuse.
HOLA Duulli Duli Duuli, si isch e ganz cooli,
HOLA Duuli Duli Duuli HOLA Duli Duli Duu.
Isch 's Michele uf ere Farbfoti,
saage alli: „em Eros sini wott y“.
Ob chauffiere, moderiere oder parliere,
bruuchts Hiirni duet si sich blamiere.
Im Bikini lacht das Stäärnli in's Panorama,
friert rasch y, dr Aafang vo emene Drama.
As scheenschti Ötzi blyybt si ys erhalte
und bi TV3 kasch dr Doon wider yyschalte.

Dert ääne am Bärgli dert stoot e gschyyde Maa.
ÄÄR het e baar Neurose
und e Grawatte aa.
HOLA Duulli Duli Duuli, ÄÄR wet jo nur cool si,
HOLA Duuli Duli Duuli HOLA Duli Duli Duu.
As Arenamoderator duet ÄÄR vermittle.
Linggi und Rächti mitenand lo ziggile.
Ärnscht und wichtig hersch'n schnuure,
neutral usgwooge bliggt ÄÄR duure.
D'Karriere isch steil, d'Nordwand au,
si inneri Gsinnig e politische GAU.
ÄÄR rutsch us uf bruunem Kuepflätter,
und wirggt erscht im stramme Falle nätter.

Dert ääne am Bärgli dert stoot e fescht Frau.
Si verzelt ys jetz 's Wätter
das wärs denn grad au.
HOLA Duulli Duli Duuli, si schwätz wie ne Suuli,
HOLA Duuli Duli Duuli HOLA Duli Duli Duu.
Doch 's Bettina, mit Vitamin B,
verloot dr Job as Wätter-Fee.
Si präsentiert jetz dr Milleniumsoobe,
mir zäppe sofort wäg zu de Schwoobe.
Orginel beglaidet, verkindet si charmant
si sig fir Leutschebach e sichere Garant.
Ir grooses Plus, dr Vaduzer Dialägg,
verdieni halt doch no Reschpäggt.
Guet dra isch: „verstoosch kai Satz“
und 's Wätter liisich am Moorge in dr BaZ.

Zum Schluss noch dies,
mir wird's ganz mies.
Teletubbies um jede Bryys.
Mit Wannemacher am Garten,
Fun auf allen Sparten.
Bitte warten, es geht gleich weiter.
Ach wie sind wir wieder heiter.
Fascht e Familie isch fertig luschtig,
Mannezimmer macht mi fruschtig.
Doktor Blues im Frauehuus, oh gruus.
Ab 23:30 mit vyyl Gschmuus.
Eurovisione fir Millione,
im Kochstudio grieni Boone.
Comedy, Talkshows und Infotheme
E Bricht iber d'Hansestadt Breme.
Leon Huber lebt, die Erde bebt,
dr 10 vor 10 Zeigfinger schwebt.

„'S isch jo nur e chlises Dräumli gsii.
Chlini Draumli sin ja so schnäl verbii.“
Y wach uf, vor mr flimmeret dr Kaschte.
18 Stund Eiger dien schwer uf mr laschte.
Yygschloofe am yysige Deifelsgroot,
dusse dämmeret 's Moogeroot.
Dr Rugge schmärzt, d'Mattschyybe ruscht.
Zyt zem ufstoo, es wird jetz kalt duscht.
All die Bromi-Abstirz nur mini Fantasie,
sozesaage privati Färnseeararchie.
Das haisst bereits hyt Oobe
dien die Entertainer ys wider blooge.
Doch wägzäppe zu de private Schwoobe
isch 's Brobleem numme lyycht verschoobe.
Denn dää Saich dert isch no schlimmer,
si verkaufe ys fir no dimmer.
Glötzophonitis, e autistichs Grangetsbild,
verbraidet sich in Zentraaleuropa wie wild.
Statt am Mittwuch Oobe go drummlle,
duet dr Bebbi an dr Färnbedienig fummle.
D' Eigerbezwingig uf 54 Sänder,
gän Dir, usgstraalt in 143 Länder,
d'Vision vo menschlicher Passion,
ächti Freizytgaltig, nit nur e Illusion.
Mache, Kollege, nit numme glotze,
dr Finger uuse nää, nit numme motze.
Yberleen 's Schnuure de Schwätzer im TV,
nur waarmi Luft interessiert kai Sau.
Au du kasch di Passion uslääbe,
sin's d'Bebbi, hesch derzue mi Sääge.

**D Ladärneuusstellig isch vom Mändig znacht, em
13. Merze, bis am Mittwuch demorge, em 15. Merze,
fir alli Bsuecher gratis offe uff em Minschterplatz.**